

四庫全書

集部

欽定四庫全書

集部

元文類卷六十八

詳校官通政使

臣

夢吉

助教

臣

常循覆勘

總校官候補中書

臣

滿有為

校對官主事

臣

陳文樞

膳錄監生

臣

虞奕綬

欽定四庫全書

元文類卷六十八

元 蘇天爵 編

神道碑

平章政事致仕尚公神道碑

富珠哩 泐

大德八年春三月己巳中書左丞尚公請老上不允若  
曰其服朕命無怠冬十月稱疾力請予告九年春還保  
定時年六十有九明年夏六月拜昭文館大學士資德

大夫中書右丞商議中書省事召不起武宗即位加榮  
祿大夫預司農事司中書職仍舊召秋九月覲龍虎臺  
大臣莫不譽公上悅若曰衆以卿宣力我家爭譽其賢  
故耳公再拜稱觴上萬歲壽御璣賜之酒故事酒荅臣  
下璣人授之不親賜也時特授公左右相目嗟異冬十  
有一月東宮賜宴翰林俄以疾還至大二年春正月使  
召辭三年冬十月贈爵三代仁皇出震召問大計稱旨  
賜宴清勝園皇太后賜宴南園夏五月丐去陞辭上御

武帳聞之以氣暄室隘勅近臣出諭若曰卿來盡心獻納朕未始不從稱老懷歸豈遽忘國家耶凡益國便民其以疏聞當行朕即行之勅宰相李道復等進秩慰餞遂加銀青職仍舊賜白金百兩金綺二匹宴中書驛送還歸時年七十有五延祐五年制贈曾祖考仲資善大夫翰林學士上護軍追封上黨郡公妣魏氏郡夫人祖考安榮祿大夫大司農柱國祁國公妣王氏國夫人考汝楫銀青榮祿大夫大司徒上柱國祁國公妣李妻魏

皆國夫人六年春正月拜太子詹事使三往迺起三月辛酉見上嘉禧殿之後閣上顧太保曲出目公曰是自世祖皇帝效力潔淨人也徐曰周卿汝前汝知古今識道理練大務太子託汝善轉之有言勿吝善教之此朕意也公見皇太子首以念祖宗孝兩宮養德性辨邪正陳之太子異其言更五月北幸觀花園北行殿上若曰朕不文直諭汝勿惜盡言教太子賜尚醒馬酒各一罍詹事俸入不受俄謝歸時年八十有二泰定三年以中

書平章政事致事制授於其家賜楮泉萬緡綺帛四端  
尚酒二尊公表謝復賜酒時年九十有一朝廷尊賢養  
老思輔長治其見於公如此四年十月八日薨享年九  
十二訃聞制贈推誠佐治寅亮功臣金紫光祿大夫司  
徒上柱國追封齊國公謚正獻公諱文字周卿祁州深  
澤人幼嗜學甫踰冠卓邁有聞世祖御極急務求賢一  
時大臣體上意銳采擇中統元年張忠宣公文謙宣撫  
河東還故參知政事王倚薦公忠宣奇之辟掌書記至

元元年辟西夏行中書書表二年始立朝儀詔魁賢鉅德者討論詳定太保劉文貞公秉忠薦公參預凡常朝朔望起居元日冬至會覲冊拜内外文武仗衛布置服色差等圖象規製皆公掌之節次入奏清問所及必公條對明白久之聖鑑通朗勅結綵畫位皇城之東百官肄習上御法座臨之見大書宸極御座之居上召公問之對天極居中衆星環拱帝德無為天下歸之其象類此上悅習已大悅遂為定制播告天下七年勅知事大



農八年轉大農都事禮成置侍儀司太保以公見上仁  
智殿擢右直侍儀使十有二年復都事大農其佐農政  
也置七道巡行勸農事聯保五課耕桑修水利立社學  
築義倉革浮薄禁游惰多自公畫十有七年出守輝州  
不事刑撻因其土俗以禮導之令行禁止河朔大旱禱  
輒雨歲大熟踰竟旱自若也聞者異之懷孟馬氏宋氏  
被誣殺人訟蔓不決提刑部使檄公讞之推跡究情得  
尉史獄卒鍊噤狀兩獄皆雪牧輝二年民安事治十九

年冬召拜戶部司金郎中初竹稅置提舉隸省部懷衛居民犯一筍一竹率以私論至破家至是抗言罷之課入郡邑害遂弭明年秋使山東定征稅度風土市廛立中制江西省憲交訟裕皇令中書公奉教訊詰罷省臣宣慰臣各一追白金千二百兩二十一年冬改戶部郎中明年春都事御史臺會聚斂臣塔斯哈阿薩哩等謂海內財穀省院臺內外監守里魁什長率有欺蠹請大蒐扶上允勅衆勿沮利黨嘯結兇壬儼使旁午省臣御史

掾吏民庶罹奔陷日衆人情危駭先此南臺御史封章  
言帝春秋高宜禪位於皇太子皇后不宜外預太子聞  
之懼公因祕之以杜讒隙此曹覘之鉗臺史督索公白  
中書右丞相安圖御史大夫伊囉勒拒之越翌日其黨  
以聞勅太宗正薛尺珩取其章太子益懼二相憂變不  
測公思用拯之方閱舊案得兇黨罪玷數十白大夫曰  
事急矣請就省圖之至遂說曰丞相大夫以勲貴忠賢  
荷天寵柱石廊廟皇太子天下本固本安天下兩公任

也此輩傾險乘釁奮不逞祕章出禍可言邪今先計奪謀使噤不容喙策之上也二相曰善入言狀上怒若曰汝等無罪耶震厲未止丞相前曰臣等有罪不辭但此黨名載刑書類非慎潔動必驚害生靈宜選重臣使為之長庶靖紛擾上徐霽威可其奏二相出宣制緩其行兇熾為沮俄而告賊賂者喧集事聞天威大震或誅或竄或奴時漢人臺臣皆闕公位幕佐以智勇忠義動大臣悟明主殲大憝銷大釁旬日之間中外清泰聞者壯

之俄丞大農治京北屯田畝澮汎溢不蓄二十四年置  
尚書省柄臣顓政急賦讒戮大臣衆股慄使者四出峻  
繩督務羸官緡徵賞悅公使燕南得鈔緡約四十萬與  
民者三之二賞雖不及功亦見時至元鈔始行置寶鈔  
提舉司隸都省金與銀禁私易小人挾威張畧獲飽饕  
餮摧破民產動再年使江西治其敝吏行詐舞文各以  
罪論或誣熊氏子買藏金尺吏訊則無之訊益酷乞輸  
直不聽聚貨簪珥作新尺符其妄迺已劉氏子誣其弟

貨利潛易金銀獄久不絕事皆類此公至率清脫民始  
寧息其年理鹽茗雜稅江右明年升少卿理獄理賦山  
之東署置濫濫汰之政令苛虐蠲之事理欺惑正之尚  
書省罷政歸中書二十有八年夏四月遷吏部侍郎考  
覈尚書省臣鈐綜所不當最簿上之流品清別井井不  
紊始以肅政廉訪司憲諸道明年公使憲湖北初提刑  
按察之憲鄂也行省奏罷其司聽揖山南者再事滯民  
疚公曰此憎忌者間之耳凡政刑大務即省議之慶祝

大禮赴省行之糾察貪墨不少貸讒格政行民始受賜  
三十一年秋召為刑部尚書公以遠近稟決刑制不一  
吏誕民瘼請依古律令米寬厚新憲草以一吏治不報  
成宗元貞元年春拜侍御史會江浙省平章用虐行悖  
行臺御史浙西憲人條狀彈劾制遣公泊大都護往詰  
之左驗明著平章者挾責驚岸不臣公等以聞平章者  
以國制軍數禁密無敢或預御史嘗取數鎮兵於是藉  
其故擅驛走都以相噬咋都省奏不用臺臣特以都護

按問制可御史逼威即承兩造具備勅省臺太師宣政等衆大臣雜議率阿勢貴犯輕宜宥御史法當死公曰不然御史職號監察今所繫者上欺下暴制使馳訊拒捍無禮罪重不輕必以軍數有禁言之小吏佐書掌給鹽米甲簿伍籍數誰不知況御史因兵卒交愬責令長帥均役情無害法即有罪亦輕不重皇上御大寶赦天下德洽民心豈宜濫刑以累聖治議都堂三辨巖廊再衆列奏公廷爭剴切上開悟平章御史各杖遣衆呼萬



歲他日集肅政堂衆憂省臺不協公曰天下無難事第  
恐處之失其要耳都省長百司丞相握大權相抗不敵  
動瀆天聽取厭傷體自今而後狼貪虎暴者抨彈之事  
不涉私者正救之果大鉏鋤論斥未晚何用紛紛衆疑  
公言未久猜釋風紀肅然二年請無數赦罷役不急上  
嘉納大德元年夏河決蒲口冬公使憲河南明年春偕  
勅使相決河籌久利公建言長河萬里湍猛東注下盟津  
地平土疏蕩徙不常失禹故疏流患中土不知幾何

千年孰保無患治得其當則民省而患遲失之則力費而患速此定論也今陳留抵東西百有餘里南岸故河口十一已塞者二自涸者六通水者三岸高水六七尺或四五尺岸北故堤水高北田三四尺或高下等大較南高於北約八九尺堤安得不破水安得不北也蒲口今決千有餘步迅快東行得河舊瀆行二百里至歸德橫堤之下復會正流或彊湮遏上決下潰終竟無成揆今之計河北郡縣順水之性遠築長堤以禦汎濫歸德

徐邳聽民避衝潰擇所安嬰患戶齒河南淤田量給永業他決視此即救患之良策也蒲口不塞便策上廷論從之河朔郡縣山東憲部爭言果然則河北桑田盡化魚鼈之區矣塞之便復之明年蒲口復決障塞之役無歲無之是後水北入巴河復故道竟如公言三年秋憲山東宣慰使挾壻宗室以浮論懲叛謂治淄青政宜猛故藉是久居方閫外掠譽而內貪虐憲糾小有違言吠噬即至公度難力爭使者往來公以溫言順附而嚴礪

之彼廼感服其下稔惡會有告者選官按詰得二十餘人決杖追贓以慰懦弱遂大慙謝逐所親昵用事十餘輩歸民田二百餘頃四年秋授中奉大夫參知政事行省江西既蒞政以吏選滄濁凡庠序之師軍民之佐財穀之主典隨事立法員數百浹日皆注無復容私衆始睚眦終莫奪俄趣公分鎮嶺南快私憤公曰此軍政也非制勅不敢行驛使顓稟得報蒙古平章偕在省餘以次出鎮衆計沮事聽公決摧彊生枯濯煩疏壅省務清

簡六年秋九月移疾北還冬十月拜江南行御史臺中丞辭明年召至京師拜資善大夫中書左丞時朱張氏得罪省臣率譴逐唯左丞相兩新平章洎公凡四人調變政務浙西水沴民饑山東歲凶盜充獄公議發官廩周罄乏縮湧價舒市易泄富足通閉遏責兼并仁客佃民能施米上三百石爵有差得米石五十萬救吳越餓殍為蘓出官緡八百五十餘萬卹齊魯敎穰亦息選清望臣使十道宣撫天下採利病得失黜貪暴安善良

江南官民田賦均減三之一南方學浮圖氏號白雲宗者髮而妻子田宅誅愚民託祝釐追徭賦倖習甘賄奏為總攝錫印章郡縣酋豪名署七十餘所衆數十萬於是罷之斥散黨與同民賦役時順德忠獻王達爾罕與君上同心輔政選庶官齊百度罷斜封汰冗員絕寶貨約濫支節淫費量入制出擇民牧屏世守定賊律除虐禁明婚制阜民生綱正目舉有中統至元之風公粹美高亮行修潔年十六七志學溯伊洛究洙泗完經太史

諸子百家該治無不綜一以仁義為根極孝友行業著  
見州閭大臣交薦聲名日振世廟方大有為衣冠元老  
森然以所能輔經緯公翱翔上下佐畫開先實與有力  
厯事五朝才識宏經濟功名映寰海德望尊廟堂忠信  
締淵穆懸車私第嗣聖繼明眷注益渥使車累召進必  
勇退從容事外二十餘年壽考康彊几杖清寂手不釋  
卷搢紳造之非聖賢中道經綸大經置不談聞者隨其  
器量大小皆潤溉天下望之若瑞星神岳素鎮嚴繇飲

食動靜皆有節制居位應務察事理守名法簡易正大  
物無不容推行所宜不膠不固大政大節利不回威不  
屈仁勇沛然綽有餘裕古遺愛遺直公兼盡之於戲世  
皇長駕闊馭網羅英才培植之久大德卿相稱賢無右  
公者養賢資世豈易言哉公娶某氏子男某某孫男某  
某年月日葬完州某鄉某原公弟之子曹州判官克和  
以國子助教張執中所狀公行遂以銘託嗚呼公往矣  
文行事功百世師也其敢以昧陋讓銘曰



皇元統天大定於一聖聖明明崇建皇極三光五岳氣  
象渾同天產人瑞以弼帝功瞻彼恒山峩峩大茂挺生  
尚公神峰綜秀始遇世皇邁績華勲禮樂稽古稼穡養  
民鴻臚大農事係賢哲左右後先夷夔稷契朱轡五馬  
衛源之許里詠塗歌神明父母孰驚皇靈七鬯震搖用  
輔執法正色立朝孰斲民力烈火凝霜用使四方雨澤  
春暘孰縱陸梁摧我獬廌用立憲紀鋒稜益大孰徇貪  
蠹扼我鴻鈞用握政柄化育載新年鄰七袞勇於告老

天制臣義豈曰太早昔也廟朝淵淵昞軒后之鑑神  
禹之鼎今也鄉社于于雍雍天下之表人中之龍有謁  
其庭鄙吝清滌齒頰餘論皆世樂石道德之容禮樂之  
度大醉而醒孰寐斯寤善數數之侯卿侯公百歲完潔  
其誰凝隆有德有文有位有壽功在史牒名垂宇宙大  
行嶙嶙濤易汙汙刻此銘詩相配無垠

大都路都總管姚公神道碑

富珠哩神

公姓姚氏諱天福字君祥拜監察御史彈擊權臣無所

顧畏世祖皇帝賜名巴爾斯國言虎也其係出唐賢相  
文獻公元崇文獻諸孫伯祿卒絳州觀察判官葬絳之  
稷山縣南陽里繇是世為平陽絳人公考處士君諱君  
實字仲華甫冠避兵鴈門金進士趙泰以子妻之生公  
及和衆主簿天祿公安白哲美風矩童丱不凡聞處士  
訓忠孝奉受惟謹從事郡府挺潔不羣儕輩畏之仕懷  
仁為縣史世皇以太弟駐白登公從縣進葡萄酒見奇  
之留侍宿衛至元初丞縣懷仁太師楊庫庫楚薦其能

於丞相塔齊爾丞相奉使朔漠脩睦宗藩引與之偕五年立御史臺丞相為大夫奏授架閣管勾秩將仕郎十一年以承事郎拜御史十三年江南平冬十二月宰相銜怒左遷同知衡州路明年春三月以朝列大夫改河東山西道提刑按察副使佩金符夏六月拜治書侍御史秩中順十六年春使憲淮西江北道秩嘉議十八年憲江南湖北二十年夏憲遼東明年春以母老請歸養不允二十二年春召為刑部尚書秩通議逾年總管揚

州不赴二十六年夏復憲淮西秩正議三十年拜中奉  
大夫甘肅等處行中書省參知政事以親辭改肅政廉  
訪司成宗即位使肅政廉訪於陝西元貞元年春三月  
遷真定總管冬丁太夫人憂自鴈門徙處士君柩合葬  
絳之稷山中書起公還真定大德三年春二月拜江西  
行中書參知政事辭奉使山東還四年秋七月以通奉  
大夫參知政事行大都路都總管兼大興府尹本路諸  
軍鄂囉總管管內勸農事六年春正月二十有八日薨

於位年七十有三公至元名臣勲德焯著其薨也朝廷悼惜吏士護喪歸平陽以夏四月某日喪稷山西北嘉禾里泰定三年以子侃請制贈正奉大夫河南江北大中書參知政事護軍追封平陽郡公謚忠肅天曆己巳侃以公行實徵銘神道之碑不獲終辭因採其本末而次第之公始為御史條奏宰相阿哈瑪特罪二十有四召廷辯公枚數其罪彼輒引服數至於二氣沮情賊上動色若曰此三者罪已不宥目公曰巴爾斯臣下有違太

祖之制干朕之紀者汝抨擊勿隱廷臣震悚其事今祕  
世未有聞時方倚相理財姑釋不問衆亦為公危之太  
夫人趙君有賢識最公曰國爾忘家汝第盡力果不測  
吾追蹤陵母死日猶生年公泣謝曰其長曰萬一得譴  
乞不以老母坐連也語聞上歎曰是母子有古義列勅  
侍臣董文忠宣付史臣書之監大名小堪布得罪御史  
按之至見歐辱繼用公往問道微服入境察悉其情還  
取驛抵其所撻挾如神簿責死罪十有七械送輦下俄

以宥貫經臺門大詔公在察院捉捕之目檢行囊得賂侍御史安烏哲台救免狀即桎堪布而祕其事夜用巡符託詞邏奄至一道士室盡獲其賂明日陞奏上曰彼七死猶赦汝欲何為公對罪十有七條七留十餘誰歸咎上悟戮敢普斥安時御史大夫二安善甚一既斥與所善猶雙陸禁中公曰安庶人耳豈得與大臣狎叱令起座皆失色公即入奏一蛇九尾首動尾隨兩其首行不能寸今憲不網蛇首二也上曰然一人二冠可乎召



兩大夫諭以公言大夫博羅懼以年少自劾罷有讒提  
刑按察之不便者有旨罷之是時廣平貞憲王伊囉勃  
為御史大夫公告之曰往者悖叛蝟起郭塞見聞今列  
憲字內廣視聽虞非常慮至深遠不但繩督有司而已  
也縷縷陳之大夫悟矍然曰幾失是夜造禁密詳奏上  
曰此天下安危計也其勿罷會駕北幸所擊相馳騎士  
縛公閱其家脫粟數斛外得言事故藁羅織苛毒公亢  
聲曰乘輿行狩戕害言臣宰相寧欲反邪捃拾無所得

斥遷衡州俄憲河東太原民饑開廩賑卹議者以擅罪  
公上知不私置勿問朔方兵興役民轉粟人畜顛踣公  
曰執政非策自蹙其本也投闕論奏改和糴疲瘵為蘇  
留遷治書出憲淮西先是蘄黃有叛者將吏賊獲良民  
以萬數公皆理歸民伍衆感泣相率立生祠從節湖北  
劾輔臣楚國公罪以聞上閱其有勞為痛治其黨會阿  
哈瑪特敗遣使治官慝遼東宣慰使阿拉克丹權黨也  
侵暴尤橫召公使遼至則封府庫究簿書審事察寃正

魁惡著公道使還即命長憲遼東公疾馳夜入詰旦蒞  
事民懽吏愕郡縣竦動初遼朔旱蝗公至雨澍蝗滅其  
境域烏桓白霄故地也民喜畜牧習射獵不事耕學公  
教以稼穡詩書居數年農厘士奮民之孝者旌之不義  
而訟積民不決者訓睦之稔惡者懲艾之武平縣民劉  
義訟其嫂與其所私同殺其兄成縣尹丁欽以成尸無  
傷憂慙不食其妻韓問之欽告其故韓曰恐頂顙有丁  
塗其跡耳視之果然獄定上讞公召欽諦詢之欽因矜

其妻之能公曰若妻處子邪曰再醮令有司開其夫棺  
毒與成類并正其辜欽悖卒臺章以公詣平灤按總管  
劉捏古伯公至劉欲遜去公密令憲僉張仲威作漁人  
匿西城橋伺之劉果與吏徒會橋下謀擒其愆仲威得  
真公一問皆伏吏胥之黥而虐扼民之吭而快其所欲  
而民莫敢校者率以罪黜平灤都吏張氏予尤狡而恃  
杖去之遠近震驚道行遵化風旋馬前公默謂之曰汝  
寃從我吾為汝理至縣舍風即見令縣以縶韃士從憲

儻覘之信宿及蒞薈而風息得五尸皆短衣其一衣中  
得小印公下令居賈行商以端匹赴縣聽和市辨之賊  
果執遼粟歲輸潯陽使督運急時民方饑公曰吾忍視  
邪留粟賑糶使不敢沮民賴以生遠人以公政通神明  
追思惠化立祠頌德入長刑曹讞獄與衆不合歸卧於  
家竟如公言衆得罪公望益隆淮西不治復握使節申  
飭舊規風采立變初宣饒徽數州有亂者官軍併俘齊  
民加以劫掠絡繹淮境公責守令嚴津防峻訶譴民復

其鄉者數千餘家帥臣昂吉爾聞淮殆二十年位中書  
右丞以宣慰使操制兵民黨結中與其子亦握兵煽虐  
奴官屬轢風紀莫敢誰何宿盜數十出沒淮海陸梁自  
宋未有制者宋亡帥掠芘其徒通納賄賂縱其所為公  
遣健士襲捕得所匿兵仗貲財定案市殉者七人自是  
帥漁鰥狀百出公疏其跡取驛上聞帥鉗驛勿給公潛  
前走得驛馳去帥遣兵校丁文虎追刺公至六河館不  
及公至揚州文虎亦至誣公於行臺俄而六河館人以

刺公狀聞文虎被執公赴覲制遣近侍阿珠治書侍御史萬僧馳訊帥以罪廢已而赴闕以擅殺淮賊諧公不中憤而斃淮境大寧丞相僧格之黨虐平陽者尤劇其敗也用公尹其府以清宿蠹詢父老得郡邑田里真偽利病緩急先後審行之民輯事理遠西吳氏子賡為女巫行眩衆事之若神人公洞其詐攝至府吏欲案究公曰亂常之跡可侈言邪立命撲死衆驚服政化無阻崇館宇引水置磴植柳代樵會飲為紆真定都會南北驛

傳雜沓事弊民瘼大臣蠟真奏牧守非公不可遂尹真  
定導壅治禁生枯壯弱日聽愬訟鑒隱破堅動無泥閤  
人人踈愜衆走府治瞻判決優肆為空初饋餼不克徵  
需日困公以楮鏹貸民因母取息蕃畜孳豐廩稍闢大  
賓館水碓創立如平陽用有餘裕宗親之位儉從之區  
秩秩井井甲諸路歲省官緡而下不加擾憲人撫細故  
劾公中書敷奏事不涉私法可施用宜著令式以示他  
州制可郡人集衆象龍祝雨公曰無益令撤去廼慮獄



囚底平允雨大需驛置新樂北阻泝水使价車騎自南  
而北者雨溢夜瞑野次無所建議徙置泝南衆大俱順  
築寺五臺督民運木奪農瘠衆令方急公不從府懼佐  
貳文諍之公曰吾民牧也惟民是卹請待農隙朝省為  
允樂城盜殺人取財夜舁尸置民隆氏邸縣笞擬隆氏  
父及二子當死械囚送府哭於庭尸毋辨賊無其子印  
識公疑之會使者決大辟公詒他賊承盜殺狀隆氏獄  
緩真盜遂獲點吏退胥之在民間者不啻百數劫持官

府而肥其家。佛其心，則禍之管庫稅廩之徒，往往破產質妻鬻子，以償所欲，而不敢與辨。公劾農諸縣得其姓名，杖死數人。質鬻者還之，餘多遁去。或改行為善士，其尹京也，立誠信繩桀，驚挫強禦，卹惇弱。事至而斷，豪右斂迹。三河民藏古銅印，怨家訟曰：「將謀作亂，縣榜掠其囚，使符所訟至府，辨其文。」曰：「三河縣印。」公曰：「何亂之為？」以不輸官罪之制，令尚廐芻秣，以鹽易諸畿民霖溢害稼。公請市旁郡戶部，據令督責上下，洵懼公帥京屬從。

部曰省竟以公謀寧息京甸京人弟假姊財不奉姊婺  
益貧弟賈益富姊發微財弟曰有券即與姊憤愬聽者  
難之愬於公諭之曰汝但歸俟徐誅劫盜扳弟對詰大  
懼吐實暨姊中分其貲公果殺直諒立朝敢言操行清  
介忠孚信格有賜輒辭上至引唐太宗賞魏徵故事曉  
之對曰臣言分也受賞非分也竟不受持憲總郡皆有  
威惠舟淮赴鄂民衆衛送不絕盜聞之戒其徒曰姚公  
正人也勿犯性孝太君年踰大耋公拜參知政事甘肅

難於輦養辭不往世高其行縉紳推論聖朝人物骨鯁  
有為終始不貳其操者公當第一固確論也蓋嘗稽之  
鴻惟世祖神鑑睿算長駕遠馭文武效能光輔丕業甸  
萬國冠百王盛矣然廊廟岳牧邪慝間出堯鯁三苗唐  
虞猶病於是大植風紀明目達聰以宏至治公當至元  
之際奮下列搏權奸蒞方州滌巨蠹自能使辨捷不能  
措其喙仇憤無所憑其兇風槩氣節炳耀一世淵衷之  
所孚公論之所與豈徒然哉其忠義剛大蘊積有素故

也公歿歷四十餘年功名事業磊磔赫奕侃訪輯遺軼  
既久始備因嘆世有家者之子與孫或不侃若先烈湮  
滅可勝惜哉叙而銘之或有待也公始娶趙氏繼楊氏  
皆平陽郡夫人子男三人壽童蚤卒祖舜祕書著作郎  
卒侃內藏庫副使楊夫人子也銘曰

帝運開天中統至元人傑斯寶匪寶璵璠惟天聰明憲  
象執法元化宣朗昭融六合堂堂忠肅始哉鷹冠謹言  
正色英風夏寒虎炳其文山立殿陞禱机饗饗魄褫魂

博宸衷凝邃上動天容庭有直臣庶儆其同有鑒其明  
有玉其潔桓桓其勇夫夫其決孰撓斯曲孰鍊斯柔善  
善豈親惡惡豈仇雖千萬人莫沮吾往如脂如韋有泚  
其顙侯符三剖憲節六持義槩秋凜仁術春熙上亮其  
忠史載其信何勸不懷何懲不震碣石之北淮海之南  
社稷尸祝無怠其嚴濤沲溶溶霍岳峩峩其融其結百  
世不廟台鼎之崇芥視不屑京尹之雄莫仲與伯有烈  
終始無間險夷誰近而忽益遠而思汾川西流河水東

會稷山之銘惟以永配

參知政事王公神道碑

富珠哩

至大元年汴梁路總管兼府尹王公年逾七十拜參知  
政事行尚書省雲南秩中奉大夫仁宗皇帝以公至元  
大德名臣拜昭文館大學士皆不果行延祐元年冬十  
二月七日薨汴私第春秋七十有九明年春三月十二  
日歸葬趙州寧晉之金符鄉換馬里中書以臺疏列公  
行績以聞贈通奉大夫河南江北等處行中書省參知

政事護軍追封太原郡公謚憲穆元統元年冬其仲子承務郎萬億賦源庫提舉鈞以翰林待制蘇君天爵狀徵銘公碑泐汴諸生也其敢辭公諱忱字九中世居寧晉魯大考進晦彩不耀大考守忠金承信校尉考玉太祖皇帝威行中夏率郡民款附從太師國王穆呼哩用武有功累官定遠大將軍慶源軍節度副使夫人王氏生公剛毅正直讀經史不事空言能見之行事裕皇位儲宮取勲舊子孫入侍公被選忠恪小心十有餘年日



慎一日或因事進說明諒不阿世祖皇帝察其能至元十七年拜山北遼東道提刑按察副使秩朝列大夫東藩諸王鷹人縱暴民大厭苦公繩以法遂斂避不敢犯時阿哈瑪特倍克固寵希合之徒言利徼倖小吏耿熙告北京宣慰臣逋官緡若干萬既聞勅徵之熙懼失實增益制勅逮繫百餘人公疏其妄熙獲罪裕皇賓天儲極虛位帝春秋高中外危之言者遂衆未見允可公建言陛下臨御多厯年所至元初豫建太子天下歸心鶴

馭上賓臣民憂懼惟早定大計以幸宗社章三上帝俞其言俄勅皇孫佩信寶撫軍朔幕大業乃定二十四年憲河南時南北既一無俚兇慝畧民子女轉賣四方公謂此徒於聖天子仁覆天下之政梗害非小建請嚴立法禁從之遂著令甲息民汪清占息民籍已再世矣兵豪狀惣帥府曰吾亡奴也即馳騎數十殺清滅口取其妻孥資產清子成逸出赴民有司惣之兵民文移往來數年不決賴兵朱喜始以避亂奴於人其主知其難於

奴也集鄉胥里長同署券免之隸賴兵籍已久喜家火其故主子謂券已焚而復奴之喜持券出懇訟不決皆詣公愬之稽清占籍以歲壬寅其奴亡以甲辰喜券足懲白之鎮南王府証者皆屈明年兩訟之仇結近侍証奏公徇制下中書遣使收公案訊公疏臺請問有旨馳召入見數陳盡底蘊帝大悅曰若人非素餐者勅省臺譙慰還職近侍及使者皆以賕敗清喜數百口脫虎咥繪公像事之二十七年置肅政廉訪司以新憲度明年

公副使燕南河間鹽漕官守盜用賦緡十餘萬覈正其  
辜諸王分地恩州其下以錢貸民加倍徵息公令子母  
相當則止餘有罪先是以民入兵限私田四頃優其家  
公曰國家取天下以來兵無寧歲今海內雖定征戍遠  
方一兵歲費不啻千緡區區限畝豈易克給在民編者  
守令猶歲差富貧以均其力一入戒行永不可變請增  
田額使無饑寒內顧之憂不報其後以兵力乏竭勅樞  
密召公等會議以真定順德廣平等路俾之詢簡得富

民數百家克兵兵之貧者遣還民伍人服其平公以舊  
臣屢憲方州至是威名益振三十年拜廣西肅政廉訪  
使秩嘉議臺檄以其廉能曉諸道疾不赴成宗皇帝即  
位元貞二年春使憲河東召見柳林撫慰優渥會并汾  
旱饑請發粟賑哺全活者衆五臺天連佛廬勅中書擇  
銳事吏董役工部司程陸信驅民夫數千冒險伐木死  
虎豹蛇虺者百有餘人其時皇太后幸其所公入言以  
寺福民福未及而害已甚非初意也徹聽開悟減其役

仍賜卹死者家宗王分土并門廩餼歲取民間或不能  
供輒立契約母息倍稱或不能償隸其子女民患苦之  
公請出錢縣官贖還其親者百二十四人於是諸王膳  
貲歲頒於官民瘼始蘇王嬖臣台哈布哈怙威肆虐公  
按正欵伏王為之請弗聽王馳使諸公上未信會駕北  
幸罪人亡走愬公不法勅中丞崔或問之俄或卒駕還  
復愬詔省憲雜訊之無驗愬者抵罪由是王禁戢藩僭  
民境晏寧大德三年遷江陵路總官不行七年遷汴梁

汴故宋金都邑號難治公至省人憲人以公舊望不敢以府屬眎之政訟之難悉聽鑑裁下無隱情久之政清訟簡吏民歌詠方家包拯公蒞汴之四年歲次丁未河決原武注汴宋汴尤急吏士具舟楫以追漂溺民大懼公白省請疏導順下勢家以田疇不利難之公曰吾守臣也當任其責即行河決壅以完城邑水息大築隄防羌族礮手居鄆陵者萬餘室民役不預公督使趣工得萬人不日隄成民至今思之公精明有斷不畏強禦所

至興學獎士脩政新民不專法令威愛兼行為世名德  
故姚文公燧劉文靜公因與公游雅相敬尚蕪君公鄉  
人也時賢言行優於志載其言曰世皇天縱有為公及  
陳公天祥程公思廉姚公天福皆骨鯁敢言視社稷民  
物利害若疾痛嗜欲在已才猷風采凜震一世庸夫庸  
婦知其姓字豈聲音笑貌為哉天故生之以弼治故善  
論也公夫人張氏封太原郡夫人子男二人曰銳曰鈞  
孫男三人洙浩以胄子肄業成均淵幼銳鈞皆有學行



种固知之其諸孫為胄子皆馴謹向學佳子弟也助教  
陳旅云銘曰

世廟帝運鴻惟永年仁決義洽德崇配天咨謂裕皇左  
右前後侍衛僕從詢賢世胄時也憲穆宿衛青宮行必  
循矩言必見忠涵育有年一靜一動帝曰良哉才可試  
用卿貳東臬蒞四品秩碣石醫閭光昭化日來歸定省  
遂蒞河南上觸廷怒下讟言狼貪帝曰忠哉斯豈尸位承  
相御史燕勞還轡皇鑑昭明飭新憲綱卿才而舊益勵

千將太行西東鴻河南北草木知名山川正色棲遲晚  
暮尹汴四封宋陳許鄭春陽誕克偏側將迎於此大府  
齒健而猙猶憚巨處上獲下順居五閱年華髮蕭蕭益  
壯益堅其卷其舒大義終始鋼百其鍊肯柔繞指五握  
憲節郡符再分洪波砥柱屹立不羣政預鈞輔遜矣其  
道文崇祕館允也其耄之顯高朗之幽神明之地列岳  
之天列星滹沱之郊邯鄲之鄙刻銘豐碑徵信惇史

元文類卷六十八

欽定四庫全書

集部

元文類卷

六十九  
七十九

詳校官通政使

臣夢吉

助教

臣

常循覆勘

總校官候補中書

臣潘有為

校對官主事

臣陳文樞

謄錄監生

臣虞夾綬

欽定四庫全書

元文類卷六十九

元 蘇天爵 編

傳

李伯淵奇節傳

曹居一

居一北渡河常欲作李伯淵傳既少暇且未詳其事竊  
有待焉歲戊申夏卧病相州俄故人僧洞然過客舍因  
語及鄉士辰之變之後之事始悉伯淵誅崔立之所自

蓋惠安長老恩公有力焉初京城荒殘恩公徙居皇建院一日莫夜侍者入告曰有戎衣腰金符者醉墮馬門外從者不能起或致寇吾得無累乎令視之識者謂總帥李伯淵也使扶詣方丈憩俟其醒語之曰當此大喪亂公何心嗜酒如是生為男子與其徒沈溺於亂世曷若立身後不朽之榮名哉伯淵矍然若有契於衷者見於色黎明乃召同志黃憫元帥者相與拜恩而師焉居無何往詣恩屏人而言曰崔立狂豎乘國家傾危天子

播越輒敢叛亂乃爾吾欲誅之久矣師謂男子身後不朽之榮名其在是耶恩拒不可曰爾何遽出此速禍語殆非老僧所敢聞者伯淵泣且誓恩察之誠也乃握手嘆曰吾情亦不能匿矣公知老僧故不去此禍亂之地否吾天地間一閒人自相州遭遇宣宗荷國厚恩二十餘年矣圖報萬一此何愛焉在吾教中有大報恩七篇是固當為者但患力微援寡事不濟耳今幸聞公舉非常之事樹萬世之名使老僧朝見而夕死無憾合爪加

額曰惟以必中為公賀未幾適驛使有相困者伯淵因之入見崔立給曰丞相避擾不出則今日之事有大不安者立欲出心動乘墮輒欲回伯淵厲聲曰我輩兵家子偶墮馬又何怪焉因強其行至故英邸之西通衢中忽有人突出抗言曰屈事願丞相與我作主且呼且前五伯訶不止直詣立馬首挽其鞵時伯淵驂右即拔刃抱而刺之洞貫至自中其左掌與之俱墜馬崔尚能語曰反為賊奴所先隨斃伯淵暨黃憫等五人實共其事

乃大呼曰所誅者此逆賊耳他人無與焉稍稍鼠竄蜂  
逝帖如也遂磔崔立之尸祭於承天門下一軍哀號聲  
動天地翌日奔宋恩公在其行時甲午秋七月也嗚呼  
金之亡也以忠義聞者不為不多至於表表獨見於後  
世者得三人焉壬辰正月陽翟軍潰奉御完顏陳華善  
死戰陣其罵敵不屈似顏杲卿癸巳正月京城不守同  
判睦親府烏克遜伯奇死宗廟其守節自盡似北地王  
諶甲午正月蔡州陷右丞完顏仲德死社稷從歿者幾



千人彼敬翔之死國田橫之感士有不足方者太史公  
曰非死之難處死為難蓋貴得其死所也來歙遇害光  
武賜策曰憂國忘家忠孝彰著此三人者有之今夫伯  
淵不幸不得在三人之列然可重者身非出於素官世  
祿雖有軍伍中未嘗為國家所知況當易代革命之後  
雖賁育之勇安所施而一旦蔑視擁軀手誅叛逆號祭  
亡社盡君臣之義竟不墮冠讎孤軍出奔偉哉後世視  
之其亦三人之亞歟李姓伯淵名也或云燕都寶坻縣

人餘不可考姑載此奇節以附野史之末云

金同知沁南軍節度使事楊公傳 姚燧

金之季年天兵滋張庭臣專謀一力惴惴以不卒保河  
外為懼捷河之北縣地數千里信敵牧蒐其中不敢認  
尺寸為已舊時則有若滄海河間恒山遼陽易水平陽  
東莒晉陽上黨九公集創殘餓羸之餘收其魂魄化悖  
為果出而用之或一二年或三四年七公竟無事効相  
繼亡敗恒山聲言入援蹶蹶不敢近京師形涉擁衆自

衛獨上黨不首鼠謀去就提孤軍闔府馬武根窟潞澤  
沁輝懷孟衛七州之心終始北捍者十二年最名純臣  
戲下激義多節死聲跡著者襄垣銅鞮襄垣懸府五百  
里鞬鞮襄垣又百里府控十餘壁皆阻山為守獨襄垣  
居易地受敵西北東三道之鋒府議非得縣上招撫使  
顯守不可牢即版顯移縣衆往始顯部將有楊公者與  
顯同里用武略聞顯戰每求副往連以勞得官至是從  
守襄垣籍其部衆纔一旅合縣民得千人敵嫌梗已未

嘗涉旬月不一至公開門延之晝止其驅夜斫其營凡  
戰禦事朝荷夕集不以勞顯若此者五年其後塹夷城  
穿如蠹室石積其下者四望各盡一射人心轉一不綫  
髮挫敵以為難稍引不逼會從顯從上黨公再復潞州  
皆再有勞詔進顯銀青榮祿大夫沁州節度使元帥左  
都監行元帥府事公懷遠大將軍同知沁南軍節度使  
事時縣官調用特怯其待戰勞一資以官地多入敵懷  
數告身無所上檄遙領故仍治襄垣公一日請顯曰以

今形勢襄垣今年跌明年保無馬武願分部曲百人立  
鞬鞞以緩兵衝顯允以便版公以前官行鞬鞞令公至  
治柵北磧處艱危中且暮年聲呼牒招山逋谷竄稍出  
集附敵悉衆攻公行夜至隘樓褫衣止宿其上中敵偵  
刺未殊猶張空拳搏數人以僨顯聞哭曰鍛吾翼矣明  
年顯死又明年上黨公釋師養安京城一實公言公代  
人諱閏少孤鞠於姊之夫禹家即今榮祿顯也始顯以  
募兵戍郡遷戍潞改孟戰有勞調臨洮司錄臨洮尤深

地戰又有勞遷招撫縣上取上黨節度公一從行死事  
之年生二十有九後如千年子仁風謂燧宜傳庶他日  
職館者得涉筆以承金史之漏云仁風厯懷邢洛三治  
中有善政

烈婦胡氏傳

王 惲

劉平妻胡氏濱州渤海縣秦臺鄉田家子至元庚午平  
絜胡泊二子南戍棗陽垂至宿沙河岸夜半有虎突來  
啗平左髀曳之而去胡即抽刀前追可十許步及之徑

刺虎割腸而出斃焉趣呼夫猶生曰可忍死去此若他  
虎復來奈何委裝車遂扶傷攜幼涉水而西黎明及李  
陽堡訴於成長趙侯為救藥之軍中聚觀哀平之不幸  
咤胡之勇烈也信宿平以傷死趙移其事上聞得復役  
終身嘻胡柔懦者也非不懼獸之殘酷正以援夫之氣  
激於衷知有夫而不知有虎也平雖死其志烈言言方  
之太山號婦何壯毅哉

何長者傳

胡長孺

何長者敬德無字或號之為孤巖善人上海縣浦東民  
家子撲謹不妄顧語善積蓄會計事吳郡張瑄行舶莞  
庫不十年贏羨莫可勝數一髮不以自私瑄父子方倚  
之重而敬德棄去矣杭吳明越揚楚與幽薊萊密遼鮮  
俱岸大海固舟航可通相傳胸山海門水中流積淮淤  
江沙其長無際浮海者以竿料淺深此淺生角故曰料  
角明不可度越云淮江入海之交多洲號為沙吳濱海  
處皆與沙相望其民頗與沙民同俗類剽輕悍急而狡



宋季年羣亡賴子相聚乘舟鈔掠海上朱清與瑄最為  
雄長陰部曲曹伍之當時海濱沙民富家以為苦崇明  
鎮特甚清嘗傭楊氏夜殺楊氏盜妻子貨財去若捕急  
輒引舟東行三日夜得沙門島又東北過高句麗水口  
見文登夷維諸山又北見燕山與碣石往來若風與鬼  
影跡不可得稍怠則復來亡慮十五六返私念南北海  
道此固逕且不逢淺角識之廷議兵方興請事招懷奏  
可清瑄即日來以吏部侍郎左選七資最下一等授之

令部其徒屬為防海民義隸提刑節制水軍江南既內  
屬二人者從宰相入見授金符千戶時方輓漕東南供  
京師運河溢淺不容大舟不能百里五十里輒為堰澹  
水又絕江淮漕泗水呂梁彭城古稱險處會通河未鑿  
東阿在平道中車運三百里轉輸艱而糜費重二人者  
建言海漕事試之良便省上方注意嚮之初年不過百  
萬石後乃至三百萬二人者父子致位宰相弟姪甥壻  
皆大官田園宅館徧天下庫藏倉庾相望巨艘大舶帆

交蕃夷中興騎塞隘門巷故與敬德等夷皆佩於菟金符為萬戶千戶累爵積貲氣意自得敬德方布衣蔬食汲汲以施貧賑之為事勸瑄父子毋嗜進厚藏以速禍蓄雖不能盡用其言頗亦損捨今江南北二人夫婦父子施錢處往往而在二人者既滿盈父子同時夷戮殆盡沒貲產縣官黨與家破禁錮而敬德固無一毫髮累會抗傳氏施天水院橋東地廣袤十餘畝敬德即建天澤院為大釜鬲炊調食羹豐潔芳腴延方外士行而欲

休倦而欲息者常五六十人大德十一年大饑鉅僧方清爨散徒敬德素履為人信重資施倍多他時來者益衆無意拒色厭官為設康仙林寺中饑民殍者不為哀止敬德請抗好善有材智人凌郭楊李僧道心性澄六七人又擇饑民得強壯者四五十人借菩提寺作粥夜鬻置大甕中明旦饑民以至先後為次列堂廡下或溢出門外道上相嚮坐虛其前以行粥約各持器來食無持則假與兩夫舁一人執杓挹以注器中食已以次去

日鬻米七八石至十石始六月三日止八月十三日凡  
七十日饑民無死寺側近與往來道上民食粥忿爭奮  
臂大呼毆擊人敬德詣其前亟拜爭者愧悔請後不復  
乃止明年春敬德請破衣集諸好善人收聚遺骸枯髑  
數十萬具語在破衣傳中夏為粥如昨歲始五月朔日  
踰三十六日敬德死年五十七後十八日所餘錢米亦  
盡遂止緇素咸曰胡不延長者至中壽今窮人無所賴  
矣天澤院不復納雲水僧饑疫棄尸如山久莫為掩云

沈子南者苦中故相裔孫嘗為義烏丞至元十三年兵  
自義烏作執之如甌得不死歸客杭猶存妻二女貧甚  
薪水傭就急則如敬德告必得粟錢帛布比十年不厭  
嘗謂予上海有善人者憐而乞我祕其人既而假予家  
僮負米問之則敬德也可不謂長者哉

胡先生曰故老言宋嘉熙四年歲行庚子大饑趙悅道  
尹臨安府發廩勸分恐弗暨奪民死中而生之初悅道  
無子養南外宗室子孟傳一夕夢之帝所嚴衛如大朝

會儀既謁贊道之陞由阼階端笏屏息抑首僂躬不敢  
仰視帝告曰與懽汝無子掾荒功多賜汝子九人趨下  
再拜稽首庭中寤以告家已而生八子與孟傳而九臧  
應星父記於書當時湖州作糜食饑人糜脫釜猶沸湯器  
中人急得糜食已輒仆死百步間饑未至死食糜者百  
無一生婺州顧籜米作糗熟而寒之約饑民旦由東門  
入與之屨使之北門賦授西門飲以藥復至東門給錢  
米出宿逆旅舍與為買薪蘇旦洗沐廣舍不過棲十人

明日復然竟去無一人死長者夜作粥貯大甕中蓋懲湖州事也有意哉

陳孝子傳

胡長孺

孝子氏陳名斗龍字南仲五世大父詢避宋靖康亂繇許徙家杭昌化縣猶號潁城散人以自表大父景純大母阮年高宋故事郊祭明堂裡祀東朝廷上壽咸詔賜高年爵民歲百太學生鄉貢進士父母九十皆得九品官封告授大父迪功郎大母孺人父天澤澤民治詩應



寶祐三年臨安府舉取元樸下第六名文解嘗從葉公  
採學葉學李公方子李學徽國文公澤民既屢試尚書  
禮部不中度游清獻公為相趙忠惠公為尹葉公為宰  
以行能上之招致弗就築室百丈谿上講所學時太皇  
太后籍未下郡縣內附徽獨不奉詔盜作婺源境工聲  
動旁近縣澤民挈妻與子廬深險處以避一歲所病山  
中斗龍才十三已能奉飲劑廢眠忘食禱神請減已年  
延父弗效母盛也尋亦病死斗龍處喪毀廬墓哭聲哀

切感動行路人有羣鴈集其上飛鳴三日夜鄉里謂鴈  
靈有知將葬澤民門人士相與私謚澤民文節參政文  
公及翁題墓上曰文節先生後斗龍娶妻有四子女鄉  
先生孫公朝瑞以溫州路儒學提舉言斗龍侍病服喪  
廬墓時事移提學得推擇為宗晦書院山長將之甌斗  
龍之妻之父之甥盛冲告斗龍曰若母王產若未一歲  
歸錢塘聞其家在清湖中斗龍大驚且哭即日與婦訣  
具裝行曰必與母俱歸若弗能得何歸為初澤民以妻

無子也以幣如錢塘求宜子者得王清湖斗龍生未周  
晬王歲期適滿遂去吳越俗以女事人期歲歸父母或  
三五七歲有子女尚不聽留惴惴恐失後聘鬻幣物女  
固不得自制此禮所謂妾母嫡子它子以為庶母衆母  
諸母如是而去者或欲比之棄黜以義斷子不得母薄  
乎此論也豈嘗得罪於其父哉長孺之妻之父徐公道  
隆伯謙甫母微亦杭人產已去歸既長求之百方弗得  
議用六十歲時母生已日始為齊衰三年及是歲之元

日以大理卿直寶章閣提點浙西路刑獄公事死吳興之難已天下若是者固不少使其李世政教脩明如乾道淳熙時風厚俗美男義女貞又安得是則其遂不克振可知也斗龍至清湖訪求母家及其故時比鄰涉三十年又經亂離固無在者矣逢白髮媪於其處指而問焉告曰我知之我家與若母比屋我與若母為兒時作伴侶嬉遊相好若母自昌化歸無幾時與我言當往江東已而泣下方盛年不識其語之為淒楚也亦弗

問何州有間兩夫舁若母竹輜西去又折以北與若母  
鄰者百十家獨老身在斗龍謹識之即入江東又濟江  
踰淮復還饒徽信廣德寧國往來數郡間六年一夕舍  
永豐縣禮賢鎮之送旅氏逆旅人怪斗龍數過問焉告  
之故且使偵之其人驚曰吾主人小婦王自言家清湖  
今王老矣豈若母耶走施氏告良久出詢斗龍父時門  
巷兒名歲甫去老婦人哭出斗龍哭前拜母子未嘗相  
見而自知其為子為母也施氏曰若母無子女我家以

母還斗龍留三日奉母歸竟如其言母歸之歲夏四月  
徽盜作溢出昌化境上殺人掠子女奪畜產貨財張甚  
斗龍為廬百丈山身自負母婦擁後未至山廬路逢盜  
數百人斗龍置母夷處稽首曰壯士斗龍幼不知母去  
壯長間母在江東行求母六年母歸未百十日即相遭  
於此斗龍若請夫婦嘗死母老誰當養母者盜咨嗟相  
約違去且語徒勿更至此山驚母傷孝子心里中人家  
頗賴之以免斗龍嘗蒔甘瓜圃中秋暮母病渴甚思食

瓜而非瓜時斗龍視空蔓中芄芄然披之異根合莖並蒂兩實者二摘以奉啖即日渴已疾平明年圃之天羅瓜如甘瓜者亦二王至今茲尚安健也斗龍作百丈谿書院祠三君子侑以澤民將延師教里子弟學又以百丈源山地五百畝為義山鄉鄰饑歲斲芎藭根續食死以莖達嚕噶齊阿思蘭取縣學鄉鄰之言及祁陽縣尹章君碩所移事狀廉之而核銳請旌表斗龍知歲惡民饑官賦食旁午自請無用是妨荒政益其意不欲人知

去年斗龍來錢塘將從長孺問學與之語誠可以為孝悌忠信者心欲為之傳以風勵人子屬其縣士孫壽國錄始末以來且曰縣人之所願得也遂定次其言如右胡先生曰陳媯姓有虞氏苗裔周興配胡公以元女大姬而國之陳紹重華祀為王室三恪及其亡也子孫用國為氏自秦漢來陳氏孝悌忠信立名當時而著見後世如太邱長輩類何可一二數孝子固其後也為泐遺風餘響尚有在者哉



史母程氏傳

袁 楠

嗚呼余嘗得三卯錄讀之蜀禍之慘誠忍言也夫朱襪  
孫之死而復生也蜀民就死率五十人為一聚以刀悉  
刺之廼積其尸至莫疑不死復刺之襪孫尸積於下莫  
刺者偶不及尸血淋漓入襪孫口夜半始蘇匍匐入林  
薄匿他所後出蜀為樞密使嘗袒示人未嘗不泣下賀  
靖權成都錄城中骸骨一百四十萬城外者不計嗚呼  
推是考蓋可悲也蜀眉州史氏由唐吏部侍郎儼從僖

宗幸蜀因家焉其先墓在青神將二十世宋世號名族  
其出蜀也今唯居湖州一房讀其遺事益悲之史母程  
夫人蘇文忠公之母之族也夫人將攜其家下峽江以  
囊金腰纏之兵暴至伏林莽與鄰嫗謀曰輸金果可生  
吾兒無資不復能出蜀史宗誠無噍類矣縱得生旦夕  
兵復至亦決死均死死以全史兒誠不恨嫗見身死為  
吾出腰中金告兒使速走湏臾兵果執母謝以實亡金  
遂遇害翼日嫗語於鄰告史氏兒兒甫十三從草野得

尸如其言寔以歸且亟圖其象識曰史光母年五十有四嘉熙二年十月二十七日申時死兵難兒遂東南來占籍湖州刻意自奮以右科為浙東兵馬鈐轄鈐轄生子圭文嘉定儒學教授嘉定生子台孫介喜孫台孫儒術通吏文復有子幾人而史氏繇嘉熙至於今且四傳矣噫蜀繇秦帝入中夏至於宋凡一千五百餘年文物大盛絕不知有兵革一旦掃削殆盡迄今百餘年遺墟敗棘郡縣降廢幾半可哀也已可哀也已

贊曰婦人內德不出門房中歌廢戰國而下俱不幸以  
著非得已也諱莫甚於死從容反復烈士猶難之況士  
女乎歐陽公傳斷臂婦人以愧馮道夫人以死傳宗承  
平世澤於是乎見作史者烏得廢諸

李節婦傳

揭傒斯

李節婦者姓馮氏名淑安字靜君大名人山東廉訪使  
時之孫胡州錄事汝弼之女山陰令東平李如忠之繼  
室也如忠初娶蒙古氏生子任數歲而卒繼室以馮氏

生子仕一歲而寡有遺腹子父沒兩月乃生名之曰伏  
訃至東平李及蒙古之族相率至山陰盡取其貲及其  
子仕以去馮乃賣釵釧質衣服權立二喪於山陰載山  
下獨携二子廬於墓時年始二十二唯布衣蔬食羸形  
苦節躬織紵為女師以自給居二十餘年教二子皆成  
學遂遷二喪反塋汶上邑人王毅以中書平章政事在  
告為親臨其喪而銘其墓齊魯之人聞之莫不嗟咨嘆  
息有為泣下者李及蒙古之族皆大愧悔羞見馮母子

馮視子任反出已子上中書參知政事王士熙侍御史  
馬祖常禮部尚書富珠哩翀翰林學士吳激集賢學士  
柳貫輩爭為文章盛誇道之山東浙東羣有司交上其  
事於朝請褒異焉其子仕伏事母極孝皆掾太府有廉  
直聲而好學不倦

史氏曰李之初喪也其族及其妻之屬能扶其二喪携  
其母子返乎汶水之上而撫存之其義孰加焉乃不遠  
二千里而來直利其財也當時亦豈欲挾其數歲之子

以去惡其無名耳以二族之人生長鄒魯之邦乃不如  
一寡婦人哀哉馮氏其亦早有家教乎

元文類卷六十九

欽定四庫全書

元文類卷七十

元 蘇天爵 編

傳

豪城董氏家傳

元明善

國朝龍興幕北走金河南中州豪傑起應以兵而金滅  
矣若真定史氏東平嚴氏滿城濟南兩張氏是也後史  
大尉有勲王室為諸氏冠豪城董氏能與之班而又以



孝義稱今遂大顯第其譜牒無徵不知世所自出其可知者徽生哲哲生昕昕生俊俊是為龍虎公傳自龍虎公起世比而第書之云龍虎公諱俊字用章少力田長涉書史善騎射金貞祐間邊事棘豪城令樹的募兵兵射上中者拔為將領衆莫能弓獨公能挽強一發破的遂將所募迎敵歲乙亥穆呼哩國王為大師而公審所歸遂為大元人已卯以勞擢知中山府佩金虎符金將武仙據真定以撼定武諸城定武諸城皆應仙公率衆

夜入真定走仙定武諸城復去仙來庚辰春金人大發  
兵以張武仙我治中李全應之中山公軍軍曲陽仙銳  
氣來戰敗之黃山下仙脫走秋獻捷於大師由是仙以  
窮降大師承制授公龍虎衛上將軍行元師府事駐豪  
城公謂大師曰武仙黠不可測終不我用當備其衝突  
然之承制授我左副元帥陞豪城縣為永安州軍號巨  
國事一委公乙酉仙果害都元帥史侯天倪據真定以  
叛我之郡縣大氏皆為仙守公提孤軍介反側間戰者

不千人拒守永安仙攻之匝年無所利秋來搽我未公  
呼語之曰汝欲得民而奪之食無道賊不為也仙慙去  
潛出兵掩擊之仙敗去久之公復夜入真定仙走死內  
史帥之弟天澤是為史大尉壬辰會王師圍汴明年金  
主棄汴奔歸德公及大軍追圍之急城人夜薄我於水  
我師殊死戰公死之夏四月十有八日也公蚤喪父事  
母以孝聞母喪以能喪聞歲時有事於廟非病不可力  
不廢拜跪子雖孩乳亦使之序曰祀以孝先也禮宜是

凡族親故人待之以恩信里夫家僮接之亦有道汴陷時以侍其軸先生為賢禮請歸教諸子嘗曰射百日事耳詩書非積久不通屢誡諸子吾實一農遭天下多故徒以忠義事人僅立門戶深願汝曹力田讀書勿覬非望為吾累也公忠實自許一心王室不為夷險少移臨陣勇氣龍衆立矢石間夷然若無事中傷亦不多每募馬援為人曰馬革裹尸吾固多援故戰必持矛先士或不可公曰我人臣也敵在前不死顧趨安脫危犬馬不

如竟死國事戍子間朝行在所諸帥獻戶口率增數要  
利史請如衆公曰民實少而數多需求無應必重斂足  
承是我獨利而民日憊也且欺君不可其以實獻行元  
帥府時狂男子三百餘人期日作亂事覺坐其渠魁餘  
釋不坐深冀間妖人扇惑圖為不軌連逮者數萬人有  
司當之族公力請主者但首惡是誅永安節度使劉成  
叛降武仙威州公下令曰逆者一人餘能去逆即忠義  
士予其家才智官之衆果去成降沃州民砦天臺為賊

既破降之他將利其子女是取公曰人降而奪之孥仁者不為衆義不取南征時人多歸公願為奴既全其家歸悉縱為民隣境人有被掠賣亦予直贖還其屬公器度宏遠善戰而惜殺人以樂為之用大小百戰戰必克為政寬而明見人美其田廬召其丈人懽與之語情不敏生者怒且罰之民惟恐其離部不得父依之也父老至今念之流涕嘗蒙全活者無不額手鳴齒云薨時年四十八子九人曰文炳曰文蔚帥諸弟事兄忠獻甚得

弟道終武衛清軍千戶曰文用厯事兩朝以誠得於上  
為時碩儒累官翰林學士承旨資德大夫知制誥兼修  
國史曰文直橐城令曰文毅同知潭州路總管府事曰  
文振早世曰文進順德路總管府判官曰文忠事世祖  
皇帝二十年未嘗有過舉嘉謨讜論有人所不能悉知  
而信於人主者天下士大夫微至閭巷細人無不知名  
聞其名無不愛重之累官資德大夫僉書樞密院事典  
瑞卿大德五年贈光祿大夫大司徒封壽國公諡忠貞

曰文義蚤世忠獻公諱文炳字彥明龍虎公長子也龍  
虎公薨時年始十六率諸稚弟事母李夫人李夫人有  
賢行治家嚴篤於教子公學侍其先生警敏善記誦自  
幼儼如成人歲乙未以父仕為橐城令同列皆父時人  
少公吏亦不之憚居半歲明於聽斷以恩濟威同列束  
手下之吏抱案求署不敢仰首里人亦化服縣貧重以  
旱蝗荐饑而府徵日暴民殆不能生公以私穀數千石  
予縣縣得以少寬民前令乏軍興貸於人而貸家息入



歲倍率取償民之蠶麥公曰民困矣頭會算斂不已足責吾為令義不忍吾代償乃以田廬若干畝所計直予貸家遂業貧民縣之間田教之藝而豪不敢奪流離漸還數年間民食以饒初料民敢隱實者誅籍其家公務衆其力而寡其戶衆危不可公曰為民獲罪亦所甘心民亦不樂公曰後當德我由是豪民富完至今外縣人或銜負不直其縣而投牒求直於公嘗上計府外縣人聚觀之曰吾亟聞董令董令顧亦人耳何明能若神也

府索無厭公抑不予或讒之府府欲中公公曰吾終不能窳民規利即棄官去世祖皇帝在藩邸癸丑秋奉憲宗皇帝命往南詔公率義士四十六人騎從世祖南詔後世祖軍人馬道死亡比至吐蕃止兩人能從兩人翼公徒行鵬領蹢躅取死馬肉續食日不能三二十里期必達會東使過公至軍言狀公弟文忠先事世祖軍世祖亟命文忠解尚廐五馬載糗糒來迓既至世祖壯其忠閔其勞勞賜優渥用輒稱旨由是日親貴用事已未

秋上命世祖伐宋至淮西有臺山砦者宋光山縣寄治其上命公取之公馳往砦下示以禍福不應公脫胄呼曰吾所以不極兵威者欲活若人也不亟下今屠砦守者遂降九月師次羊羅洑羊羅洑宋之要害也築堡於岸陳船江中軍容甚盛公請於世祖曰長江天險宋所恃以為國勢必死守不奪之氣不可臣請嘗之與敢死士數十百人當其前率弟文用文忠載艨衝鼓擢疾趨士叫呼畢奮鋒交公麾衆走岸搏戰宋師大敗文用颿

船報捷世祖大喜戟手上指曰天也明日渡諸軍圍鄂  
州會上崩閏十一月班師庚申世祖即皇帝位於上都  
是為中統元年上命公宣慰燕南諸道還奏曰人久弛  
縱一旦遽束以法危疑者尚多與之更始宜赦天下制  
曰可反側者遂安二年擢山東東路宣撫使就道會立  
侍衛親軍上曰親軍非董文炳難任即追授侍衛親軍  
都指揮使佩金虎符三年山東守將李壇反據濟南壇  
劇賊善用兵會諸軍圍之壇不得遯久之賊勢日削公

曰窮寇可以計擒乃抵城下呼璫將田都帥者曰反者璫耳餘來即吾人毋昧取誅死也田縋城降田璫愛將既降衆亂遂擒璫璫勝兵有浙連兩軍可二萬餘人勇而善戰主帥怒其與賊配諸軍陰殺之公當殺二千許人公言主帥曰賊由璫脅從者何罪殺之徒膏草土耳良乖陛下仁聖陛下往伐南詔或妄殺人雖大吏亦罪之是宜勿之帥從之大悔已殺者而殺之者亦自恨失計璫伏誅山東賊未靖山東搖以公為山東東路經畧

使率親軍以行出金銀牌五十有功者聽予閏九月公  
次益都留兵於外從數騎衣裳而入至府不設警衛召  
瓊故將吏立之庭曰瓊狂賊誑誤若曹瓊誅死若曹為  
王民陛下至仁聖遣經略使撫汝相安毋恐經略使得  
便宜除擬將吏汝曹勉取金銀牌經略使不敢格上命  
不予有功所部大悅山東安至元三年上懲李瓊潛弭  
方鎮之橫以公代史氏兩萬戶為鄧州光化行軍萬  
戶河南等路統軍副使造戰艦數百艘肄水戰預講取

宋方略先阨塞要害盡諸禦備列柵築堡深為吾利上  
召公密謀欲大發河南民丁公曰河南密邇宋境人習  
江淮地利河北畊以供需河南戰以啓土宋平則河北  
長隸兵籍河南削籍為民便又將校素無俸稍連年用  
兵至有身為大校出無馬乘者臣即所部千戶私役兵  
士四人百戶二人聽其顧役稍食其力上皆從之始頒  
將校俸錢以秩為差七年改山東路統軍副使治沂州  
沂與宋人接壤鎮兵仰給內郡餼餽有詔和糴本部公

亟命收州縣所移文衆皆爭以違詔公曰第止之乃遣使入奏略曰敵人接壤知吾虛實一不可邊民供頓甚勞重苦此役二不可困吾民以懼來者三不可上大悟仍舊和糴內郡九年遷樞密院判官行院事淮曰築正陽兩城兩城夾淮相望以綴襄陽以擣宋腹十年拜參知政事夏霖雨水漲宋淮西制置使夏貴帥舟師十萬環攻我急矢石雨下公禦之城上夜貴去復來俄飛矢貫公左臂著脇公拔矢授左右發四十矢許房矢絕索



矢左右又十餘發矢不繼而不能張滿遂悶絕幾殆明日水浸淫入郛麾士卻避貴棄之壓吾軍而陳公病創子士選請代戰壯而遣之公飲痛束瘡手劒督戰士選與貴將搏斬貴將以戈貴將仆不死獲之以獻貴去不敢復來王師大舉入宋右丞相已延行中書省自襄陽東下及宋人戰於羊邏泚公以九月發正陽十一年正月會丞相於安慶安慶守將范文虎以城降公請於丞相曰行省兵既勞於羊邏泚行院兵當前行均勞宋都

督賈似道禦師陳於蕪湖似道棄師走次當塗公言丞相曰采石當江之南和州對峙不取慮有後顧請先取和州許之遂降知州事王喜三月有詔時向暑師宜持重行中書省駐劄建康行樞密院駐劄鎮江時揚州真州堅守不下常州蕪州既降復叛久之張世傑孫虎臣誓真揚兵致死於我真揚兵先期敗不敢出世傑等陳大艦萬艘碇之焦山下江中勁卒前左公身犯前左載士選別船而弟子士表請從公顧曰吾弟僅汝一息脫

吾與士選不返士元士秀猶足殺敵吾不忍汝也士表  
固請乃許公乘輪船建大將旗鼓翼二子船大呼突陣  
諸將繼之飛矢蔽日戰酣短兵相接宋人亦殊死戰聲  
震天地橫尸委伏江水為之不流自寅至午宋師大敗  
世傑走公追及夾灘世傑收潰卒復戰又破之世傑走  
海公船小不可海夜乃還俘甲士萬餘人悉縱不殺獲  
戰艦七百艘宋力自此窮矣冬十月王師分三道而左  
公由江並海趨臨安先是江陰軍僉判李世修乞降奪

於勢不能來城復為宋公予之檄世修以城來令權本  
軍安撫使所過民不知兵凡所獲生口悉縱遣之無敢  
匿者以故威信前布望旗自靡張瑄者有衆數千自宋  
時負海陸梁公命招討使王世強及士選往降瑄士選  
單舸至瑄所諭以威德瑄降得海舶五百瑄後至大官  
十三年春正月次鹽官鹽官臨安劇縣竝救不下招之  
一再反將佐請屠縣公曰縣去臨安不百里遠聲勢相  
及臨安降有成約吾殺一人將誤大計況屠縣於是遣

人入城諭意縣降遂會丞相於臨安北張世傑欲以其  
主逃之海公繞出臨安城南戍浙江亭世傑計不行竊  
宋主弟吉王昞廣王昺南走而宋主焘出降丞相命公  
入城罷宋官府散其諸軍封庫藏收禮樂器及諸圖籍  
取皇帝諸璽符上之丞相丞相以宋主還覲有詔留事  
一委公禁戢豪猾撫慰士女宋人不知易主也時翰林  
直學士李槃奉詔招致宋士至臨安公謂之曰國可滅  
史不可沒宋十六主有天下三百餘年其太史所記具

在館且悉收入以備典禮乃得宋史及諸注記凡五千餘冊歸之於國史院典籍氏宋宗室福王與芮赴逮京師徧以重寶致諸貴人公峻却不取及官錄與芮家具籍所致貴人重寶獨無公名丞相朝奏曰臣等奉天威平宋宋既已平懷來安集之功臣董文炳實最諸將留事謹奉詔矣上曰文炳吾舊臣忠勤朕所素知乃拜資德大夫中書左丞時張世傑奉宋主弟吉王昱據台州閩中尚為宋守敕公進兵所過禁士馬無敢履踐田麥

曰在庾者吾既食之在野者汝又蹂之新民何以續命  
是以南人不忍以兵鄉公次台世傑遁諸將先俘州民  
公下令曰台人首效順我不暇有而世傑據之民何罪  
敢有不縱所俘者以軍法論得免者口數萬薄温州溫  
州未下令曰毋取子女毋掠民有衆曰喏守將火城中  
逃公亟命撲滅火追擒守將數其殘民之罪斬以徇踰  
嶺閩人扶老驪迎漳泉建寧邵武諸郡皆送款來凡得  
州若干戶口若干閩人感公德最深至今廟而祀之水

旱疾病禱焉十四年北圉有驚上將北狩正月亟召公  
四月公至自臨安北至上日問來期及至即召入公拜  
稽首曰今南方已平臣無所効請事北圉上曰所亟召  
卿意不在此豎子盜兵朕自撫定山以南國之根本也  
盡以託卿卒有不虞便宜處置以聞中書省樞密院事  
無小大咨卿而行已勅主者卿其勉之公跼蹐避謝不  
許因奏曰臣在臨安時阿勒巴奉詔檢括宋諸藏貨寶  
追索沒匿甚細人實苦之宋人未洽吾德遽苦之以財



恐非安懷之道即詔罷之又曰臣有專擅之罪初泉州蒲壽庚以城降壽庚素主市舶謂宜重其事權俾為我捍海寇誘諸蠻臣解所佩金虎符佩壽庚矣惟陛下鑑裁上大嘉之更賜金虎符燕勞畢即聽陛辭裕宗在儲宮公求見敕曰董文炳任重見畢遣行既見惻諭懷至且曰上嘗多卿公留士選宿衛即日就道凡在上都三日至大都五日至中書樞密不署中書案平章政事阿合馬方怙寵用事生殺任情惟嚴憚公姦狀為之少斂

執筆起請曰相公官為左丞當署省案請至再四不肯署皇太子聞之謂官臣哲古訥曰董文炳深慮汝曹所知後或私問其故公曰主上所付託者在根本之重非文移之細且吾少徇則濟姦不徇則致讒讒行則身危而深失付託本意吾是以預其大政而畧其細務也十五年夏公有疾奏請解機務詔曰大都暑熾非病者宜卿可此來固當愈公至上都奏曰臣病不足領機務西北高寒筋骸暢逸當復自愈請畢力北役上曰卿固忠

孝是不足行樞密事重以卿僉書樞密院事中書左丞如故公辭不許遂拜八月上生日禮成賜宴掌禮者奏公坐公坐上坐諭宗室大臣曰董文炳功臣也當坐是每尚食上食輒輟賜公是夜疾復作勅諸御醫日來診視九月十三日夜疾革洗沐而坐召文忠等曰吾以先人死事恨不為國洗邊今至此命也願董氏世有男能騎馬者勉報國吾死瞑目言畢就枕薨上聞痛悼之良久命文忠護喪葬藁城令所過有司以禮弔祭制贈金

紫光祿大夫平章政事謚曰忠獻勅翰林待制李謙誌  
其墓翰林學士承旨王磐撰神道碑公忠實似其父人  
主益信之嘗曰朕心文炳所知文炳心朕所知故讒間  
不行而功立在軍或與長官爭事長官國人持已見不  
公是公曰第上兩奏得可事乃行長官輒不敢上卒公  
是蓋上嘗誡長官者曰董文炳老成練事汝父行也事  
事聽之文炳不我負也公薨後十餘年姦臣僧格事敗  
有詔董文炳子名士選者速召入上素愛士選有父風

即拜江淮等處行中書省左丞召入卧内上曰汝知汝  
父事朕否士選拜謝曰臣愚不足以知上曰若父忠勤  
不欺能成吾大事汝士選不必遠學學而父足矣又嘗  
問士選曰汝知曹彬如何士選謹對曰曹彬云云上曰  
曹彬不殺降一事較之而父未足為多必欲盡書而父  
竹帛有幾也公平居不妄笑語毅然有不可犯之色立  
朝諤諤有古大臣風故上每論漢人功臣謂可任屬大事  
者必首公而追惜其壽止於六十二也事人主三十年

任大事豫大議其廟謨廷論逸不盡傳史臣無從考索  
最著於閭里者孝友天至居母喪哀毀骨立奉祀事一  
遵其父而有嚴教諸弟如嚴師諸弟事之如嚴君雖貴  
顯如文用文忠歸休沐不敢先私室侍立終日夜不敢  
坐不問不敢對裘馬金帛公未嘗先御有即盡賜諸弟  
閨門之間肅然而諸弟或以過被笞皆惻然受之以改  
及喪公毀瘠踰禮而思其蚤孤深賴賢兄以成之也世  
之言家法者比為萬石君奮家云公好讀書延禮儒士

士雖賤必接以禮若金翰林直學士潯南王若虛先生  
真定提學侍其先生軸存則師尊之沒則卹其孤而侍  
其提學家子孫與之婚姻至今雖在兵馬間教諸子不  
暫廢公退日一再至塾程其學與儒者講明聖人之道  
評品史事夜分乃休居官清慎家無餘財其子孫化之  
亦能清慎世其家子士元剛不下人以氣由內供奉為  
武節將軍侍衛親軍千戶佩金牌及宋將姜才戰於揚  
州身被十七創而卒士選今為資政大夫御史中丞領

侍儀司士秀資豪興才藝過人事裕宗東宮寵信無比裕宗崩終明威將軍前衛親軍都指揮使佩金虎符

贊曰或曰為將三世必敗其後受其不祥董氏貴顯四世子孫數十百人或曰活千人者必有後龍虎公忠獻公為大將不妄殺濱死而生之者無慮數十萬人其諸以是為德與嗚呼董氏其未艾哉雖然繼美大家斬澤仆世孰非人子者

節婦馬氏傳

元明善



馬氏參知政事楊公居寬之繼室錢唐民家女也至元十四年僧格奏立尚書省奪中書機要又以計傾罷之先誣居寬等死没入其帑以馬氏賜衛士馬氏託狂疾呌呼遺糞溺不可近竟免侵迫楊氏陰贖之歸遂削髮廬墓誓死不嫁後僧格敗事得昭雪而馬氏以無子乞歸錢塘養其獨親楊氏許之日紡績給食凡十有餘年大德七年十月乳生瘍或曰當迎醫不爾且危馬氏曰吾楊氏寡婦也寧死此疾不可男子見竟死時年四十

餘嗚呼節義於人大夫一或執之不變雖孱夫弱婦使  
強悍之人降心相下何乃英聲壓世而臨利害之頃一  
失所守無異禽犢死等爾不義而生無寧義死此烈士  
夫之所以焜耀也馬氏亦足稱哉

張淳傳

元明善

張淳樂師也清州人父德祿始入樂籍淳早孤學軋箏  
即知求巧既長名貫京師凡為調曲盡聲韻玄妙入神  
成一家藝鉅公宴集淳更新聲四坐為傾然非其意不

可召也名在上所為管勾為安和署丞夫仁宗皇帝曲宴淳必在一宴一蒙賚置玉宸樂院特授奉訓大夫玉宸判官降玉宸院為儀鳳司進淳階中順遷儀鳳少卿詔造乾箏岳柱龍觀及緣盡玉桐梓金錯之典奏遂以賜淳加嘉議為卿甚悅淳每有遇賜辭厚取薄氣不盈而色懼君子蓋有取於淳云

贊曰帝在位十年天下治平宰相無事以戚之從容肆體而豫焉淳也質直厚和無他緣飾進其絕藝賜之一

顧知音者謂唐叛軋箠以來未必有淳之手自足名世  
矣嗚呼先朝凡一賢人必蒙超擢不止淳也淳乎其亦  
殊遇哉

高昌契氏家傳

歐陽玄

契氏輝和爾氏也先世曰多伊克本突厥部以女普爾普  
妻穆克爾蘓汗為哈屯乃與謀其國政唐史突厥傳載  
其事甚詳穆克爾蘓卒國亂普爾普哈屯率衆歸唐唐封為  
賓國夫人而多伊克故地盡為回紇所有穆克爾蘓子孫

遂相回紇回紇即今輝和爾回紇嘗自以其驚捷如鶻  
請于唐更以回鶻為號輝和爾者回鶻轉聲也其地本  
在哈喇和林即今之和寧路也有三水焉一並城南山  
東北流曰鄂勒歡一經城西北流曰和林河一發西北  
東流曰古爾班塔密爾三水距城北三十里合流曰僕  
輦傑河回紇有布濟克汗者實始居之後徙居北庭北  
庭者今之巴實伯里城也會高昌國微乃併取高昌而  
有之高昌者今哈喇和卓也和卓本漢言高昌高之音

近和卓之音近昌遂為和卓也哈刺黑也其地有黑山也今輝和爾稱高昌地則高昌人則回鶻也高昌王有印曰諸天敬護護國第四王印即唐所賜回鶻印也言諸天敬護者其國俗素重佛氏因為梵言以祝之也多伊克子孫既世為輝和爾貴臣因為輝和爾人又嘗從其主居契輦河上子孫宗多伊克為始祖因以契為氏焉以河名也相傳多伊克初為國相適當唐天寶之際唐以安史之亂求回鶻援兵多伊克與太子吹達喇帥師與討

安祿山有功封太傅忠武王進位司空年百二十而終  
傳數世至克呼布拉襲為本國相達拉哈錫號諳達都  
督遼主授以太師大丞相總管內外藏事故國人稱之  
曰藏額濟類屬密拉齊托克托伯奇叛阿拉善王三召克呼布  
拉至則言於王曰托克托驍勇未易力攻臣少與親善彼  
不忌臣可以計取今與王期以七日當斬其首以報乃  
先遣家僮往取密拉齊馬百匹托克托使追之則紿追者  
曰丞相載馬取蒲萄酒見女主爾追者返以告托克托喜

迎之于郊握手歡甚饗公畢謂曰今日易營初托克托置  
酒行營二日遂易名以嬖夫人攝之謂克呼布拉曰公  
其少需我先往遲公至既行乘驛從後大呼止之托克托  
止陽曰有密語請屏左右托克托如其言乃奮曰私恩公  
義有難兩全者吾奉王命取爾首爾亟拔劍斬之左右  
股栗不敢動持首白王王悅賜伊蘓郡地暨雅爾約蘇  
博果斯約蘇二山狐白裘一初兵出鄂爾和河河水素  
湍急俄而水止國俗以為水寐占者曰禱之必有應公



以裳盛水初曰願子子孫孫勤勞王家其熾如火其續如繩以忠以孝永保令名言訖以水洒河河水湍流如初又嘗盛暑袒跣卧大樹下鴉鳴樹上心惡之攬衣起且犍鴉下爪犍者三方怒提之毒蛇自上墮地賴鴉免於螫戒世子孫勿殺鴉及死之日有神人跪請曰帝詔丞相以劍擊柱斥之神滅公以是年卒葬伊蘄郡西五里曰科爾羅名之曰辛子伊伯勒龍國相為達拉哈諳達都督太師大丞相仍兼通管內外藏事七子長曰達

琳次曰約蘇巴勒曰察遜曰巴噶曰巴爾曰哈拉托音  
曰托果斯約蘇巴勒二子長曰必里克特穆爾次曰伊琳  
特穆爾因必里克生而敏慧年十六襲國相達拉哈時  
西契丹方強威制高昌命太師僧少監來圍其國恣睢  
用權奢淫自奉王患之謀於必里克曰計將安出必里  
克對曰能殺少監挈吾衆歸大蒙古國彼且震駭矣遂  
率衆圍少監少監避兵于樓升樓斬之擲首樓下以功  
加號必里克呼爾敦進授明伯克妻和碩特哩子弟以多

伊克之後世為其國大臣號之曰舒又曰沙喇猶漢言戚畹也未幾左右有疾其功者譖于王曰少監珥珠先王寶也必里克匿之盍急索勿失王怒誅寶甚急必里克度無以自明乃亡附國朝我太祖皇帝賜以金虎符獅紐銀印金螭椅各一衣金濟遜按尉四人飲食供帳殆擬王者仍食二十三郡尋又賞銀五萬兩以弟伊琳為質必里克沒高昌諸部塗哭巷弔歲時祠之伊琳精於輝和爾書慷慨以功名自許貲算悉以畀兄子身無私

馬年十五以質子從太祖征討多戰功皇弟烏珍奏求  
師傅上命公公訓導諸王子以孝敦睦仁厚不殺為第  
一義上聞嘉之中原諸路悉命統治既而從平河南徙  
鄧縣民萬餘戶入樂安以便偃拊尋授河南等處軍民  
都達魯噶齊佩金虎符并賜宮女四人所得尚方賞賚  
悉輦歸故郡以散親舊且盛陳漢官儀衛以激礪之國  
人聚觀咋咋豔慕道出河西所過榛莽或時乏水公為  
鑿井置堠居民使客相慶稱便太宗皇帝即位以中原

多盜選公充大斷事官從烏珍出殿順天等路公布德化寬征徭盜遁姦革州部清整尋復監河南等處軍民年六十七卒于保定今贈宣力保德功臣山東宣慰使謚曰莊簡托果斯二子次曰薩奇蘓風儀魁岸識度宏廓蒞事寬猛適宜初為諸王烏珍筆且齊領王傳事王薨長子哲伯早世嫡孫塔齊爾幼庶兄托迪狂恣欲廢嫡自立薩奇蘓與和爾果斯馳白皇后特爾格氏乃授塔齊爾以皇太弟寶襲爵為王薩奇蘓以功與和爾果斯分

陝黑山以南薩奇蘓理之以北和爾果斯理之從憲宗  
攻釣魚山建言乘勢定江南必有峻功上嘉納之命世  
祖取武昌王取武昌王取淮安東西並進未幾上崩班  
師集闕額呼布格睥睨神器諸王多附之王亦首鼠進  
退薩奇蘓聞之馳見王力言世祖寬仁神武中外屬心  
宜專意推戴若猶豫不決則失幾非計也王從之世祖  
即位授薩奇蘓北京宣撫賜宮人瓮吉喇特氏及金帛  
章服聚至鎮鋤強艱姦革邪除穢遼東以寧會高麗有

異意上遣使究切則委罪於弼臣洪察呼械送京師道  
遼東薩奇蘓訪知洪以直諫忤意故即奏疏為直前謾  
上命釋洪俾討叛黨平之山東李壇反奉詔偕諸王哈  
必齊等東征應會決機轉戰數十合生得壇戮于市復  
濟南益都等五十餘城哈必齊欲屠之力爭曰王者之  
師誅止元惡罔治脅從於是釋囚繫返流逋歸剽掠吹  
枯蘇簡節踈目傳檄四封輿情大悅投資德大夫山東行  
省大都督遷經畧統軍二使兼益都達魯噶齊辭不拜

上言山東重鎮宜別選貴戚臨之上不許因賜京城宅一區益都田千頃及李璫馬羣園林水磴海青銀鼠裘等嘗慕古人舉親舉仇之節惟才是用或以子姪為幕僚或以里閭知舊為文學官或以叛帥舊卒為部曲將不顧身嫌專為國計公論多之兵後民有田乏牛具為之上聞驗民丁力官給以牛人得肆耕李璫故將毛璋率諸部謀執之以附江南璋黨禿劉懷其恩以璋謀上變乃襲璋斬之統軍綽爾巴哈畋遊無度害稼病民元帥



伊蘇岱爾等豪據民田以為草地隨事表聞得旨執綽爾巴哈減死杖之勒伊蘇岱爾等還故土山東諸郡與宋人接壤時見侵掠乃拔膠與密等州丁壯屯沂莒以逼連海宋邊師丁某懼以所統來降其為民捍患為國拓土類如此推賢讓能知人善任名臣宿將多出其門碩望雄名餘五十載忽一夕星殞于舍年六十四卒于京師之南城山東父老相與刻石紀勲德焉今贈安邊經遠宣惠功臣資德大夫河南江北等處行中書省右丞上護

軍追封雲中郡公謚曰襄惠伊琳十子長曰伊爾默色  
巴哈次曰都督默色巴哈曰威喇巴哈曰都哩默色曰巴  
薩巴哈曰實喇巴哈曰華善曰哈喇巴哈曰圖古勒巴  
哈曰圖呼巴哈都哩默色初從薩奇蘇討李璫以功奏  
為行省郎中繼除博興沂州監郡會丞相巴延督諸軍  
取宋慨然曰吾世受上恩此立功報國之秋也吾其從  
戎乎薩奇蘇嘉其志謂丞相舉以自代乃與從子色埒  
默俱隸丞相麾下與攻襄樊進兵陽邏堡順流至丁家

洲宋相賈似道出視師迎戰奔潰都哩默色為前鋒引大軍乘勝逐北與宋殿帥孫虎臣戰于焦山破之陞蔣安撫翼監戰復攻常州得雋陞斷事官江南既平擢安豐路達魯噶齊行省以其廉能署處州路達魯噶齊時新附之民懷攜阻兵每單騎招降兵不血刃人以四哥佛子稱之後見平章阿哈瑪特竊柄張甚恥為詭隨居閒養晦五年日本之役以為征東都元帥又與丞相安達哈李牢山等異議辭行已而安達哈等果敗運使盧樞

以言利擢中書右丞欲引為參知政事知懋不可以共  
事亦辭不拜後懋果以罪誅遷同知浙東宣慰使司事  
東陽賊楊震龍作亂鄉民或為賊應卒討平之朝廷以  
江浙財計至重命為行省郎中及僧格當國屢欲援為  
助固謝不就遷太平路達魯噶齊同時平南大臣如丞  
相蒙固岱高興國公史弼河南王布琳濟達皆以兄禮事  
之一時善辭命都哩默色與阿里齊名行省凡有入奏  
必命之往每至上前開陳是非得失披析解駁如指諸

掌上嘉掌曰惟卿及阿里言事能稱朕意爾阿里後秉  
鈞衡而都哩默色官止廣西憲使卒哈喇巴哈倜儻有  
節槩好義如嗜欲恤窮若姻戚恤危蹈難循國忘身兒  
時父以斷事官治保定留之待母鄂通氏居益都一日  
忽作而歎曰幼而不學有不墮吾宗乎即趨父所自白  
父奇之俾習輝和爾書及授語孟史鑑文字記誦精敏出  
於天性李璫之亂鄂通氏挈季子圖噶布哈辟地登萊  
間音問隔絕號泣徹晝夜尋從薩奇蘇平亂山東卒購

獲奉以歸人以為孝感所致薩奇蘇深加器重自謂才  
具不及言於世祖召給宿衛嘗以王事至益都於四脚  
山中置廣興商山二治以勞授金符除商山鐵冶都提  
舉未及代以職讓厥弟天兵南向饋運繁興被選為行  
都漕運使帥諸翼兵萬五千人從事飛芻輓粟夜警晨  
嚴軍資以濟南北混一與有功焉事平上封事大要言  
親肺腑禮大臣以存國家之體興學校獎名節以勵天  
下之士正名分嚴考課以定百官之法通泉幣却貢獻

以厚生民之本又言江南新附宜昭舊族振滯賞懋力  
稽通商弛征薄入以撫馴其民不然恐尚煩宵旰之慮  
廟堂多采用其言屬漕米二十萬由邗溝達于河舟覆  
舟覆損十之一而又每斛視都斛為虧五十分斛之三  
時阿哈瑪特秉政責償舟人哈喇巴哈伏闕抗言量之跣  
羸出於元降而水道之虞非人力有弗戒彼雖罄其家  
不足以償若朝廷必不任虧損臣獨當其辜而已上命  
勿治政柄者憤無所泄則詘公監寧海路後遷江西宣

慰使未之官改除廣東轉運鹽使兼領諸蕃市舶時盜梗鹽法陳良臣等扇東莞香山惠州負販之徒萬人撞搪相和江西行省命與招討使達實密討捕之先驅斬渠魁以訊馘告躬抵賊巢招誘餘黨復業仍條言鹽法之不便者悉祛其害按察使托歡大為姦利劾奏罷之羣盜歐南等僭王號偽丞相招討衆號十萬因圖上其山川形勢及攻取之策三十餘條建言揃刈弗亟其勢長聲生蔓延未已遂與都元帥呼巴哩哈雅宣慰都元



帥白佐萬戶王守信等分兵搤之功最諸將無何右丞索多督兵征占城交趾素多其知勇屬護餉道比至東莞博囉二界中遇劇賊歐鐘等橫絕石彎其鋒銳甚於是忼慨語其下曰軍饗重事也望風退縮以誤國計吾弗為也即身先士卒且戰且行矢竭馬創徒步格鬪蹈數十人勇氣益厲以衆寡不敵為所執賊欲奉之為主罵曰吾方岳重臣肯從汝為逆耶正有死爾遂遇害于中心岡時至元甲申二月之十九日也年三十有九是

夕忽夢夫人竒塔特氏曰廣寇之亂吾死矣言已乘雲而升天矯如龍徑西北而去知事劉閏張德亦夢城門有金榜哈喇巴哈衣金甲指麾其中謂吾死今治此煩若二人為功曹翌日凶訃至俄而閏德相繼死時羣寇未息官軍追捕邦人往往見其乘騅督戰或聞空中隱隱金鼓聲咸驚異以為神繪像祠之生平將兵理財部分明禁令嚴凡所施置後為法程敷歷中外以才幹稱以死節著中朝罕儔也贈通議大夫戶部尚書上輕車

都尉賜號守忠全節功臣謚曰忠愍竒塔特氏封高昌  
郡太夫人盛年寡居貞操凜凜義方有嚴二子長日傑  
文質次曰越倫質文質甫十歲刲股以愈母疾粵之人  
士謂忠貞孝三節備于一家故相與繪為圖而傳觀之  
既長名迹獵獵稱其家延祐初守廣德治法風聲為諸  
郡最會朝廷經理江浙田糧行省以番陽官吏不稱職  
委訊其事至則用法外意治貪猾吏為民害者闔郡稱  
快改授通議大夫潭州路總管潭為大郡既至興利除

害執法不阿當道嫉其軋已者構誣以罪事既白遷贛  
州路總管尋佩金虎符同知廣西宣慰司事副都元帥  
會柳州慶遠賓州徭民叛領兵數千進以策誘賊黨擒  
其渠魁一十九龍半天等一十三人以歸賊衆望風奔  
潰降者幾萬人復置屯田為守備計開通故道以絕其  
負固之念省垣憲府交章論薦謂其有文武才略如古  
良將遷正議大夫吉安路達魯噶齊中書嘗檄往廣西  
海北審斷所至明決既而引年休致家于豫章東湖之

上子五人曰僖玉立登延祐戊午第今翰林待制朝請  
大夫兼國史院編修官曰僖直堅登泰定甲子第今承  
務郎宿松縣達嚕噶齊曰僖哲篤登延祐乙卯第今中  
順大夫僉廣東道肅政廉訪司事曰僖朝吾登至治辛  
酉第今承務郎同知濟州事曰僖列麓登至順庚午第  
今從仕郎河南府路經歷越倫質早歲警敏篤學無子  
弟之過未仕而歿贈從仕郎山東東西道宣慰使司都  
事一子曰善著登泰定丁卯第今承務郎天臨路同知

湘潭州事文質嘗謂玄曰吾宗肇基僕輩今因以僕為  
氏蓋本本水源之意也且高曾以來勤瘁王家訓興大  
業而俛仰陳迹非托之文字大懼湮沒無以示來者謹  
具世次履歷以請玄惟太史公論贊夷齊顏跖反覆致  
意於天道報施蓋甚惑焉每讀之輒廢書而歎以為古  
今同一轍也及觀僕氏世磊砢相望勲節在國利澤在  
民雖汗簡所書何以尚此諸季起家擢科如射命中異  
時以涵演述碩大顯融無落於其世識者已有以覘之

則是既根而食實售物而取償天之於僕氏獨昭昭不  
忒如是異乎前所聞矣使造物報施每率是道天下有  
不樂為善者哉又惟別生分類古之道也僕氏遠稽前  
聞邇厥本始以垂方來綿延百世遂為中州著姓實自  
今啓之厚之至也凡此皆予所嘉稱而樂道者敬最其  
實為作家傳後之秉筆紬金匱石室之書者則或有徵  
於斯文

元文類卷七十

元文類跋

右國朝以來詩文七十卷右司都事趙郡蘇伯修父所  
類也守誠在胄館時見伯修手抄近世諸名公及當代  
聞人逸士述作日無倦容積以歲年今始克就編不以  
微而遠者遂泯其實不以顯而崇者輒褫其善用心之  
公溥也如是夫古者以言名家則有集傳其別而叙之  
於史傳者非發明乎學術之說則闕繫乎世道之文也  
不然君子無取焉是則伯修豈無意而為之者乎伯修



方以政事嚮用所集名臣事略及是書皆將刊布天下  
天下之士得攬焉者孰不美國朝文物之盛嘉伯脩會  
萃之勤矣伯修名天爵以國子高等生試貢入官力學  
善文多知遠金故事亦有論著他書無所不聞予之敬  
交也故題文類後元統三年三月三日太原王守誠書